



Selasa, 12 Maret 2024
Ogen: Keluaren 4:25



Nunatkan Anakna



Zipora labo kalak Israel, ia kalak Midian si labo nandai Dibata Jahwe. Bas perjabunna ras Musa erbahanca maka tanda perpadanen bangsa Israel ras kesusurena pe enggo kena man anak-anak Zipora ras Musa. Dua anak Musa e, Gersom si ertina "Aku sekalak pertandang i bas ingan enda" ras Elieser si ertina "Dibata Penampatku". Gersom tubuh i Midian tapi Elieser tubuh bas perdalanen ku Kanaan.

Sada kejadiin asum Gersom kitik denga, bas paksa e enggo seh pendilo Tuhan man Musa gelah ia mulahi bangsa Israel bas Mesir nari. Ibaba Musa me Zipora ras anakna atena mulih ku Mesir. Bas tengah dalam ibunuh Tuhan ateNa Musa. Si e jadi erkiteken perpadanen Tuhan man bangsa Israel gelah tep-tep anak Israel arus i sunat. Zipora langa nunatken Gersom. Perban terancam kesah Musa, minter isunatkenna anakna jenari dareh e kenaina ku nahe Musa. Lanai sahun Musa mate bas paksa e. Gersom nggo ngaloken tanda sunat, Musa selamat.

Sekalak nande kimawen arus naluken sura-sura ukurna amin gia mehuli akapna, adi e sura-sura Dibata. Sebab sura-sura Dibata nge si mehulina man banta, man anak-anakta, man doni enda pe. Tanda sunat e eme tanda keselamatan man sinursur Israel. Adi la isunatken Zipora si Gersom, maka seri denga ia ras bangsa-bangsa si deban si la nandai Tuhan. Jenari Musa pe jadi salah, man bangsa Mesir pe jadi musuh, bas bangsa Israel pa la iteki. Taluna ukur Zipora maba dampak simbelin bas jabuna. Uga kita, Zipora-zipora jaman enda, si pelebe nge kehendakta ntah sura-sura Dibata? Lakokenlah peraten Dibata maka ibas paksana pagi siantusi sura-suraNa e.

➤ Labo Peratenku, PeratenNdulah jadi...